

तुबारि संपादकीय
टीम

◆अस इ उम्मिद करं लगे से कि एण बाड़े दिन अन्तर सुआ मेहणु इस कम अन्तर सहयोग कते।

◆इस तुवारि मासिक पत्रिका समाचार पत्र एक्ट अन्तर रिजिट्रि नेई भो। सिर्फ पांगि घाटि अन्तर पढूँ जे इ पत्रिका शुरु कियो सि।

◆तुवारि एक अवाणिज्यिक पत्रिका भो।

◆तुवारि पत्रिका कोइ मेहणु, जनजाति, त संस्कृति गलित कठेण जे नेई छपाण लगे। अगर कोइ ई सोचता बि त अस जिम्मेवार नेई।

◆छपाणे पेहले सोभ आर्टिकल दुई टाई पांगेई मेहणु हरालो असे। इ त खुलि बोक असि कि पेहलि बार पांगवाड़ी लिखणे सुआ मुशकिल भुन्ति त गलति बि भुन्ति। अगर कोइ लिखणे गलति असि त असि जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल्स ना मिले, या घाटि मेहणु के मदद ना मिले त तुवारि पत्रिका कदि बि बंद भुई सकति।

◆कोइ चिज छपां सि या नेई छपां जे तुवारि संपादकीय टीम पुरा अधिकार असा।

◆अस किलाड़ केन्द्रीय पुस्तकालय, त बजार राखे ठेके भैइ हरिरामे दुकान अन्तर तुवारि ड्रॉप बॉक्स पुठ बि अपुं सद्दाव ओर आर्टिकल्स रखुं जे सुविधा कियो असि।

◆अस सोभि पांगि मेहणु जे हात जोड़ कई निवेदन कते कि, तुस बि कोइ अछा आर्टिकल, पुराणि या नौई कथा, कहावत, कविता, त नौवे घीत (पांगवाड़ी अन्तर) लिख कइ छपां जे हेंनदे दिए।

तुवारि संपादकीय टीम

☎ 9418431531
☎ 9418429574
☎ 9418329200
☎ 9418411199
☎ 9418411599



‘अम्मर अन्तर अत तारे लोते भो कि जोसण ना केइयल,
इस नउए साल 2017 अन्तर तुं जिन्दगी अन्तर अत
खुशी लोती अओ कि गम ना लोते केउओ।’

रिश्ता

चम्पा ठाकुर

जिन्दगी पिछाण भो रिश्ता, सुखे-दुखे महरवान भो रिश्ता।

कपले जुड़ते त कपले टूटते ए रिश्ते, कपले मिते त कपले उशकते ए रिश्ते।

“कपले धुप त कपले शोलियार ए रिश्ते, ‘जिन्दगी पिछाण भो ए रिश्ते।

कपले खुशी घिन कइ एन्ते ए रिश्ते, कपले गमे साया बण घेन्ते ए रिश्ते।

कपले डुबणेवाड़ी सहारा देन्ते ए रिश्ते, कपले अपु तन्हि बि बेगाना बड़ाई छते ए रिश्ते।

कपले धुप त कपले शोलियार ए रिश्ते, जिन्दगी पिछाण भो ए रिश्ते।

कपले हसांते त कपले रोलांते ए रिश्ते, कपले पयार बण कइ ई समाइते ए रिश्ते।

टोड़णे बेलिए कपले बि ना टूटते ए रिश्ते, सुख-दुख जोड़ हें सात असे ए रिश्ते।

कपले धुप त कपले शोलियार ए रिश्ते, जिन्दगी पिछाण भो ए रिश्ते।

रिश्ती के अन्हि धागी ई ना टोड़े, हंसि कइ गड़े लए अन्हि केआं मुँह ना मोड़े।

यक लिंगि उशकि कइ टूट घेन्ते ए रिश्ते, तउं लख करियल कोशिश कदि ना जुड़ते ए रिश्ते।

कपले धुप त कपले शोलियार ए रिश्ते, जिन्दगी पिछाण भो ए रिश्ते।



अपु अपु हेरणे नजरिया

बबीता

यक लिंगि यक सधु बाबा अपु शिष्य जोड़ साते दरियोउ अन्तर सनहुण करण लगे थिए। तउं यक मेहणु तेन बड़ गा त दरियोउ अन्तर सधु बाबा सनहुण कते कआ त से तेस केआं किछ पुछूण जे रुक गा। से सधु बाबे केआं पुछूण लगा, ‘बाबा जी यक बोक बतए कि इठि बिशणेवाड़े मेहणु कीं असे। किस कि अउं होता नउआ-नउआ इस जगाइ अओ असा। नउआ भूणे बड़ाइ जोड़ मोउं इस जगाई कोइ जानकारी नेई।

तउं सधु बाबे तेस मेहणु जे बोलु, ‘भाइ अउं तें सवाले जवाब पता देन्ता। पहले तु मोउं जे इ बता कि तु जेस जगाई केआं अओ असा, तठियणि मेहणु कीं असे?’ तउं तेन मेहणु बोलु, ‘तन्के बारे कि बोलुण बाबा जी तठि त यक केआं यक कपटी मेहणु बिशते। तउं त तन्हि छड़ दी कइ इठि बिशण जे अओ असा।’ सधु बाबे जवाब दुतू, ‘तोउ इस गां बि

तिहाणि मेहणु मेते कपटी, दुष्ट त बुरे।' से मेहणु अगर घेई गा।

तड़िया पता यक होरा मेहणु तेस बते बड़ आ त सधु बाबे जे नमस्ते करण केआं पता बोलु, 'बाबा जी अउं इस ग्रां अन्तर नउआ असा, त परदेश केआं अओ असा। त इस ग्रां बसण चहंता पर मोउं इठियणी कोइ खास जानकारी नेई। तउं त तुस मोउं बतई सकते न कि इ जगा कीं असी त इठियणी मेहणु कीं असे?'

सधु बाबे इस बार बि तिहाणि बोलु, 'अउं तें सवाले जवाब पता देन्ता, पहले तु मोउं जे बता कि तु जेस देश केआं अओ असा। तठि बिशणेवाड़े मेहणु कीं असे?'

तेन मेहणु सधु बाबे जे बोलु, 'बाबा जी जठिया अउं अओ असा तठि बि खरे, समझदार त अबल मेहणु असे। में तठिया होर कोठि घेणे जे मन न थिआ। पर व्यापारे कमे बड़ाई जोइ इस कनार अओ असा, त इठियणी हवा-पणि बि मोउं खरु लगु तउं त मेई तुसी केआं पुछू।' तउं सधु बाबे बोलु, 'कोइया तोउ इठि बि खरे समझदार अबल मेहणु मेते।' से मेहणु बि अपु बते बड़ घेई गा।

तसे शिष्य ई सोब हेरण लगो थिया। त तेन तेस मेहणु घेंते त पुछू गुरु जी ए कि तुसी दुहि मेहणु जे अलग-अलग जवाब दुतू मोउं किछ बि समझ न अऊं। तउं सधु बाबे मुस्करई कइ बोलु, कोइया खास कर अस अपु ओत-कोत बई चीजी जीं हेरते से तीं भुन्ती नओ। तउं त अस अपु मुताविक अपु नजरिए बड़ चीजी हेरते। पर तिहाणि हेरते जीं अस असे। अगर अस भलाई हेरण चहेल त असि हर कना भले मेहणु मेते। अगर अस बुराई हेरते त असि सोब मेहणु बुरे ई नजर एन्ते। सोब अपु-अपु हेरणे नजरिया असा। ए भो जिन्दगी सार।

जिन्दगी


गीता शर्मा

जिन्दगी यक दरियओ भो त तसे कोइ कनारा नेई, जिन्दगी यक बहार भो, फि बि तुफान ऐण असु।
जिन्दगी यक धुप भो, फि बि मेघे लगड़ी असी। जिन्दगी यक सावन भो, फि बि पतझड़ ऐण असु।
जिन्दगी यक दन असा, फि बि रात एणी असी। जिन्दगी यक हकीतत भो, फि बि मौत एणी असी।
जिन्दगी यक कड़वा सच्च भो, जेस यक रोज मिट घेण असु।


पपु अपु दोस्त टपु जे बोता.....।

बबीता

अगर बगैर दंती कुतर
कटियाल त कि करुण...



'सुधु असु बारा भाई बगैर सुई चौधा
टिके लइ छइ.....।



ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please 9418429574

एडस बीमारी इन्सान जोइ यक लिंगि सम्बन्ध बणाणे बेलिए कसे बी एडस एई घेन्ता... कॉडोम सिर्फ 18% सुरक्षा कता...एडस मेहणु के जिसम अन्तर कम से कम 7 केआं 10 साल तक कोइ लक्षण नजर न एन्ते।